

沅

湘

耆

舊

集

沅湘耆舊集卷第十四

新化鄧顯鶴湘臯編輯

鄞縣沈道寬栗仲校訂

易檢討舒誥五十七首

舒誥字欽之號西泉攸人宏治乙丑進士改庶吉
士授檢討正德初以忤逆瑾不見容改南戶部主
事瑾誅復入翰林以親老乞歸養家居十四年杜
門不出所著有浯池集三十卷張龍湖云西泉先
生仙才也天機迅
發不煩繩削而自合在詞館八年梁文正公稱其
文重當時筆驚風雨洵不虛也攸與詩鈔西泉
集原本久佚康熙甲午續刊止入卷前先生修學使
序之曰浯池初刻之序僅存張龍湖先生一篇今
讀其詩如開卷曰南州臥病思前集東閣承恩感
聖明憂早日聖主宮庭南顧斷遠臣江海上書遲

忠孝藹然有神於綱常名教西堂分韻曰海內百年能幾會尊前今夕是何辰嶽遊日直上最高處恍然聞步虛皆有唐人法度

居流塘效陶

吾非愛流塘流塘吾所生狐獸尙有仁况復列冠纓寂寞有佳味川轡多故情名園花草閒嬉遊約所經相逢漁與樵談笑與弟兄家嘗富春韭鄰春足秋秔時或故人來有魚雞可烹淹留坐終日門巷無喧聲

題毅齋

義利惟兩途相去不盈尺偉哉君子流介然不相越凜凜橫秋霜皎皎干白日吾亦奮吾剛持心伸萬物

折腰行

清晨下牀日初出梳頭著履如鳥疾忽然有物據腹閒屈
伸不得氣衰息顧問荆妻何爲爾撫摩倉皇各相視凡百
舉措待他人尺寸之膚亦大矣腰乎腰乎汝亦苦使我畏
汝如畏虎臨風咳嗽且憚難周旋坐起無甯宇中郎誕辰
六十一殺牛置酒街填溢咫尺堂階未能行口底流涎空
鬱鬱多謝高鄰與親故慰問慇懃滿村路落魄乾坤一腐
儒奔走諸公無乃誤嗟汝何事漫相欺我亦何曾負汝爲
平生志慕陶彭澤斗米聊將一笑辭逆瑾當年焰灼天生
殺子奪呼吸邊我乃當廷與之抗無貽汝汗流青編又有
權姦通私謁我亦不能爲取妍明日南遷入江左行雖顛
沛心悠然將老光陰復幾許我心匪石不可遷汝其相安

莫相病吾將保汝終殘年

中秋夜寄陳甥體乾

老夫正坐愁中秋廚中拙婦渾無謀陳郎念予餽牢醴雪
藕冰桃來見投山童挑負上階阨使我一見開眉頭旋呼
庖丁手親授指點烹調充晚饕紛紛紅縷玉盤列片片新
冰磁碗浮此酒須尋翠竹爐更當酌以紫霞甌待得明蟾
出海上我與徘徊瞻斗牛斯時一發萬古興盡寫秋光登
畫樓

謝高穎之惠長箋

涼葉下空階寒飈鳴促織我有悲秋萬古懷薛濤箋短書
不得柳州高士我最知封題百幅來相遺洗手開緘嘩滿

屋皓若清冰光奪目我愛工倕制絕倫爛然五色相鮮新
細文密縷簇花草相看如對吳門春蜀江之錦楚江練一
般風骨誰能辨龍劑鳳管皆汝儔莫向詞林誇素絹并刀
不能爲之裁剡水不能爲之漉魚網烏絲亦等閑至今名
號猶流馥興來一灑硯水枯寫我秋懷三百斛與君相守
莫相忘世閒奇物終難藏他年起草南宮裏薦汝同登天
子堂

別院中竹

使我忘羈思庭邊翠竹叢映窗常瑣碎著雨更玲瓏舊主
明朝別此君誰與同春風各有意寄入楚湘中

偶書

簷雨亦何意愁人自上心十年同蠅屈一室類蜚吟憾苦
懷難釋居憂氣轉深山公聞有疏何以報知音

憩浯池懷丁少參約遊不果

海內丁參伯平生冰雪心此來逢酷暑高興阻幽尋林步
松風度窗眠竹氣侵潘安秋有賦杖屨意還深

和前韻答唐貳守

五載長沙郡清湘照素心偶從今日見宜向古人尋憂國
容顏瘦耽書歲月侵單車頻按轡雨露自沾深

湘梅春早同人作

江畔一枝春離人自不禁我歌湘水曲君誦越溪吟湘水
豈不廣越溪亦何深寄語西湖子風煙勞素心

和悲秋

玉宇澄秋素幽人此際心世情悲遣扇古意寫瑤琴歲月
頻欺鬢商聲忽在林楚臣詞調古誰更續遺音

失題四首

逐敵金陵道單于有廢臺關門秋色斷羌笛夜聲哀少婦
龍沙夢長安鶴使回秋今青海月流影碧天來

雄劍委龍鳴關門白髮生功成百戰後老去一身輕夜月
桓伊笛秋風驃騎營燕歌何處寫曲罷有餘情

曠野杳無際孤舟齊魯閒河流東下險天氣北來寒古道
蒼煙迴長亭落照閒微茫雲水外一點是梁山

秦塞山河壯新豐車馬繁八方朝異服萬國荷殊恩柳拂

金張第花明許史門酣歌喧白日拔劍繞芳樽

南村

吾愛南村好頻過處士家白雲留客住濁酒隔牆賒陰壑
藏春雪清溪洗暮霞自今來往慣薇蕨早抽芽

得陸太史子淵見懷之作和韻

高才自是朝陽鳳同輩齊懸學士魚溪上最憐愁杜甫園
中誰記病相如三年楚國懷人夢一紙吳門隔歲書讀罷
風前重展看不知西日轉階除

述懷

芳芷一江君子意春花萬樹野人居山林蹤跡同麋鹿交
字生涯似蠹魚得意欲忘絃上調養生惟愛枕中書極知

懶拙隨年甚不是交遊向晚疏

西堂分韻得新字

傑閣高城風日迴孟冬幽薊似青春天連碧水遙當座雲
斷燕山轉近人海內百年能幾會樽前今夕是何辰淹留
不覺成沈醉露下樓臺月色新

懷鹿

常娘古柏住仙園偶逐長風墮我前蕉裏驚心成往事鏡
中窺影是何年蒼苔舊臥痕猶在紅葉新裁意尙懸搔首
白雲溪上望斷腸芳草漫連天

謝友人寄扇

蜀國佳人遺寶箴楚狂持玩思悠哉峨眉新月半輪缺巫

峽清風萬里來
晉代蒲葵徒重價
漢宮恩怨自多才
何時更屬趨承地
袖向朝陽殿裏開

班竹馬上酒

詩酒煙花最有情
定於此處過浮生
移將叱馭回輪步
且作觀山玩水行
富貴已知身外事
文章何用世閒名
胸中未到羲皇上
敢謂淹留自有成

憂旱

非無好雨隔天池
甚有愁聲在路歧
聖主宮庭南顧斷
遠臣江海上書遲
風光今日還如此
世事將來未可知
遊子樓臺歡自好
狂夫詩句苦生悲

夜坐念東征將士

狂夫弄劍橫諸郡天子徵兵過五原
深夜猶傳飛檄報寒冬頻望賜衣
恩鼓聲角吹驚河北錦帳牙旗照
海門諸葛昔年龍虎陣魏軍西走
漢廷尊

赴嚴張二太史衡山之約

山中一臥便多年又泛瀟湘此日
船忽去塵埃病若洗渺然江海興
無邊水痕蹙月懸高岸帆影搖空
出斷煙漫憶美人衡嶽上丰標如
玉映南天

遊方廣寺

形勝西來又一關居然身已脫人
寰路懸樹杪頻疑墮山擁雲間近
欲攀定有神仙經此地擬尋靈藥
住吾顏朱張二老芳蹤在寂寞蒼
苔對雨斑

遊花藥寺

紅塵忽見出孤刹寶地誰知隱地藤今我不來真負汝昔
賢聞亦喜逢僧江山似欲留人住花鳥渾如識面曾深謝
迨陪諸俊彥登高作賦愧無能

北寓書感

昨日逢人淮水北南來直是楚衡阿故園盜賊溪山滿異
國傳聞涕淚多髀肉漸消驚道路乾坤無補尙恩波驚駘
未復思千里淹蹇江邊意氣磨

遊朱簾洞

泉歸朱簾何處洞來尋半日洗心魂水中坐石搖杯影雲
際磨巖破蘚痕寂寂草花秋不斷霏霏煙雨晝常昏此中

合有神仙住我欲相從未敢言

潛池漫興

四山圍合樹交加一徑穿雲曲似蛇占得風煙三畝地
賈將春雨一溪花園多鮮果朝常送市近香醪夜可賒料得
他年歸老計定於此處足生涯

官道野望

路轉高原望渺茫牛羊點點散斜陽平沙曠野連天闊白
草黃雲接塞長前代戰爭堪涕淚北人弓馬是尋常吾家
直在江南盡今夕何緣到此鄉

清明出郊和韻答陸三汀

牙牀石軸坐春城春與詩人暗有情如此風光難一醉從

來佳節幾逢晴海天愁鬢還宜柳杖履幽懷劇傍鶯開到
辛夷再乘興石橋深處野人行

和于太守登城勝覽

詩狂少日上青霄曾夢江淹五色描老去只餘心未了愁
來還藉酒能消三旬九食東方士一局千年少室樵名利
何年真脫屣釣船臥聽楚江謠

重過西涯

入春三日一來過柳未回青水未波斷石有痕曾繫馬舊
堂無客爲籠鷺東風北渚寒猶在爽氣西山晚更多因與
故人談往事相看不覺鬢絲皤

壬辰秋避兵東都門外

南河盜賊頻驚客東郭蕭條暫索居九月又催彭蠡雁十年不食武昌魚獨看黃菊還高興忽報滄洲有捷書明日長風須萬里楚江花鳥正懷予

初度時正德己卯歲

今朝四十五年客去矣青春將柰予晚節正濃營壑興薄寒將及授衣餘羸軀但覓延年術病眼常求大字書北望京華悲阻絕到門時或有雙魚

舒誥於憂悲憤亂中覺人世不可以居浩然有慕於神遊汗漫之事作懷仙詩自遣

羅襪凌波裊素瓊香風不動彩雲輕眞仙一去何時返江上數峯秋月明

洞門深鎖萬桃花中有仙人醉紫霞
待得過橋食石髓與君同上紫雲車

黃庭芝草應難遇碧海琅玕不易餐
養就一雙珠頂鶴有時騎上白雲端

題畫

細雨濛濛樹萬重繞村溪路紫苔封松巖
定有幽人住知在秋山第幾峯

淺紅深綠半殘時出郭尋春不道遲
猶有桐花尙堪把一尊相對雨絲絲

攤書草閣林鶯囀隱几茅簷燕羽翻
不爲西山有懸瀑杖藜容易過南原

縱橫籬落茅齋小
委曲江干草樹空
一葉孤舟向何處
半帆斜日半帆風

欲向南村訪薜蘿
風生洲渚起寒波
沙頭恰有垂楊樹
且繫蘭舟莫渡河

豆花梧葉沿山閣
蟲語秋泉雜梵聲
坐到四更江月起
不孤乘興寺中行

騎馬看山路轉賒
草橋南畔日西斜
倦來且坐溪邊石
先遣長鬚問酒家

積雪連朝三尺屯
梅花千樹遶西村
平原莫怪無人跡
僵臥衰安不出門

曉起尋春一水遙
夜來中酒未全消
陰崖說有桃花片
一

路鶯聲送過橋

折竹聲驚萬壑虛晚風江上有歸漁閒來只共梅花笑雪裏何人到草廬

五更風緊雪初晴屋角諸峯一半青短髮不梳光似雪據牀仍讀太玄經

寒溪夜漲桃花雨春岸晴多楊柳風爲寄函書下揚子故人多在石頭東

青山隱隱連天柱紅樹層層帶夕雲聞有肉芝如股大不妨同問大茅君

新正鄉團慶節

鄉村喜氣各匆匆又是相逢花柳中不及西泉閒太史年

年被屋傾春風

題海棠

朝元閣裏逞嬌紅春夢驚回海甸空不是少陵無好況巾
原遺怨寫難窮

庭院沈沈春晝長美人和淚整新妝眼前物色都題遍今
日纔輪到海棠

沙河道中

漠漠黃沙路天寒尙薄氛鳥飛煙隴沒水到石橋分矮屋
全依樹危峯半入雲夷歌清有調村語樸無文邊戍愁聞
檄關河舊洗軍前朝詢故老悽惻對斜曛

遊海印寺坐鏡光閣和韻

性僻偏耽山水頻况登高處看粼粼澹雲淺浪浮元氣翔
羽沈鱗散暖春橫笛小舸依古岸烹茶老衲汲寒津聆經
野鶴虛投閣諳法仙猿解避人欲向箇中舒曠志卻驚衣
上有餘塵風花漫許隨吟畔蘭杜遙思到遭濱今古幾人
臨此地乾坤忘我是何身山頭暮色催歸鳥何日重來賞
更新

晉柳州文相一首

文相字士衡巴陵人宏治乙丑進士授漳浦知縣
遷南戶部郎出爲汀州知府再補柳州有品泉稿

秋日登岳陽樓

徙倚闌干望眼孤杪秋風景未應疏半空雲捧樓臺出四

面天開水墨圖夢澤有時吞別渚君山亘古壓重湖方輿
不復長江限莫更登樓問楚吳

鄧副使文璧 一首

文璧字良仲桂陽人宏治乙丑進士授崑山知縣
擢工部郎中歸起雲南副使

韓張亭懷古

詩篋南遷雁盡頭雲連楚粵望秦州豈曾磨蝎同安命未
到銜驂尙控愁期會村凝煙欲暮欹眠館冷月橫秋山亭
誰記貞元事惟見滔滔武水流

唐僉都鳳儀 一首

鳳儀字應韶邵陽人正德戊辰進士累官僉都御

史巡撫四川初芒部土舍隴壽兄弟爭襲讐殺攻劫地方朝廷屢用兵斬獲部議以隴氏親支已盡無人承襲請改設流官統之旣而芒部賊沙保等謀復隴氏攻劫如故先生以芒部易流非策又時值荒饉不宜用兵乃上言烏蒙烏撒東川諸土官故與芒部爲唇齒自芒部改流諸部內懷不安以是反者數起臣請如宣德中復安南故事俯順輿情則不假兵而禍源自塞巡按戴金亦以爲言遂罷兵蜀民大悅先生性誠篤學問淹博居官廉潔所至剔姦翫弊風采肅然初巡按蘇松特疏請表揚死宸懷知府朱以方之節按浙江尤多善政人

稱唐父所著有巡浙錄芒部紀事諸書歿祀鄉賢
今所存止芒事竣簡戴待御一詩其稱戴侍御者
卽四川巡按戴金也事見明史土司傳

芒事竣簡戴侍御

川南又報征期蹙遑恤兵窮武先黷前年剛計縛支屬今
歲復夷隴氏族變夷用夏更民牧直欲改觀振荒服無時
有夢徵蕉鹿誰信安危相倚伏普奴突起圖報復焚人廬
舍擄人畜急章上聞敢嫌賸危言不覺動鈞軸師出時當
月五六旱魃正爾虐禾菽豈惟邊餉乏儲蓄百姓嗷嗷正
枵腹可憐剗盡心頭肉四野攜鏡掘黃獨觀感有人寄耳
目萬里等閒通尺牘元臣體國文章覆重瞳直矚逃亡屋

沈氏言集卷一
况復西聞一路哭宵旰愁應增萬斛罷兵一詔只半幅傳
宣豈獨置郵速撫臣稽首敬披讀蜀人盡展眉閒蹙輟輸
漫散江頭舳舻息肩歡笑徹空谷我皇萬壽隆萬福孰謂黠
夷同草木知今尙德弛刑戮幡然悔禍殊局縮僉曰我豈
非臣僕那敢跳梁肆詆誆何勞試識苑中竹不須仍抱山
頭犢作孽渠魁渠自撲罄巢擒獻出林麓塵氛迅掃邊疆
肅一方安堵歸眷育莫訝功成不信宿廟堂早已籌之熟
好勤勛庸陳輦轂庶幾旌創分姦淑天顏有喜同清穆

龍參政誥

一首

誥字孔錫攸人正德戊辰進士授臨川知縣遷戶
部主事歷郎中出守廬州累遷廣西參政以病歸

著有東洲文集

一統志謂初知臨川縣值東鄉多盜詣城壘諭降之督賑江西疏免

通累出守廬州歲飢出振疏罷馬價茶牙諸稅酌

常平濟糶諸法著爲令攸輿詩鈔孔錫牙諸稅酌

循聲最著江南通志名宦傳云嘉靖癸未大旱詔

開陳設粥平糶營建惠民倉鎮淮樓藉力役以給

食所活數萬道死者設義冢瘞之明史世宗本紀

嘉靖四年夏五月甲戌賜廬州知府龍誥官秩詔

天下倣誥備荒振濟法其法史不備載殆卽江南

通志所言者是已詩集久已散秩惟詠西關浮橋

一作舊存志乘中亟登

之以備一邑掌故云

浮橋

躍馬尋芳作勝遊飄然身似馭長虬錦瀾水湧鯨鼇壯金

餅雲開蟠螭浮題柱勲名曾自許濟川舟輯果誰酬盈盈

黃甲洲邊水盡是恩波晝夜流

按此詩亦收入通志山川門題作羅浮山一統志羅浮山在攸縣東四十里有石竇出泉涓涓不絕

東入攸水明統志下與鳳嶺連麓又黃甲洲在縣
西二里舊隸於學貢民藝植供祭祀饌廩之用明
辨此宜作羅浮山為是

李任子兆先七首

兆先字徵伯西涯先生子詹國子監生有異才年

二十七卒有東行稿一卷四庫存目有徵伯存

稿十三卷

懷麓堂兒子兆先墓誌銘吾子兆先年

入院病跌而止二十一復試不售以詹為國子生

二十四三試同試者傳誦其文期必得魁解偶誤

寫題字卷不得錄今年二十七試期且迫忽病作

小愈病再作遂不起然子以盛滿屢思引退兆先

能不予抗當其志識所到雖展脫以從亦無難者

乃使之兩不遂以死嗚呼尚忍言哉尚忍言哉兆

先幼習經義輒能作老成語既乃嗜古作子兒所

撰述心頗怪之曾檢蘇老泉集不得久乃知為所

竊視字已漫矣若自是文思驟發諸老先生見必

駭異其為歌詩尤稱自得於古人朴直簡澹言語

所不及獨深願解有手舞足蹈意於是不假揮綽
徑趨高峻子當其年實未嘗造詣至此也顧牽縈
舉業往往爲予所禁不得肆開有應答又爲人促
迫寸楮片札多不存稿故子亦不能盡見惟歸妹
闕里有東行稿成帙既病猶手書寄友二百餘篇夫
也其友聞之又相與輯其遺詩文得二百餘篇夫
苟知其止此盍使之脫棄舉業盡力於古之文縱
其所之亦足以一遂其志而竟莫之遂以死也可
哉勝憾

送人

南國騷人憶薜蘿每逢尊酒一酣歌隔年鄉信春前至入
夜歸心夢裏過舊路漸隨燕樹遠故山偏傍越溪多陽和
到處流漸盡時送東風與碧波

送李士綸南還

碧水長衫映黑頭歸時還及洞庭秋家山別後無鄉信霄

漢從來有壯遊慚我屋廬占上國送君魂夢繞中洲東園
甘旨堪供養正值西風白稻收

漫興

小園散步暫徘徊黯靄陰雲去復來深樹欲秋黃落葉斷
階經雨碧生苔頻搔短髮和愁亂靜掩蓬門待客開無限
幽懷酣睡裏日華亭午夢初回

春日答所知

草堂無事起常遲閒愛逢春靜愛詩十日濃陰常帶雨一
池空碧漫生漪回院柳鶯猶澀開到園花蝶未知三尺
短牆君共我韶光如此合分誰

絕句

酒家高樓臨水邊門前柳枝好繫船北人過來醉一晌南
人住此又經年

行人折柳寄相思又見春風換故枝若問無情閒歲月
是新條未出時

秋來賈客淚沾巾路草牆花各自春莫向中流歌楚調舟
中多是贛州人

蔣提舉英一首

英靖州人宏治朝貢生官四川提舉

弔宋忠節公

天荒登甲榜海內數清流夢死一彭蠡生官兩靖州漫同
宋玉賦空弔屈原愁贈廕皆餘事芳名國史收

按宋義卿先生未第時夜泊鄱陽湖夢吏持檄口上帝命汝爲靖州城隍公甚訝之及守瑞州始知瑞爲古靖州也
事之前定如此

李推官纂二首

纂字仕謨安化人正德閒貢生官臨清知縣擢瓊州推官仕謨有胆略五指黎叛單騎入峒撫之黎人出一烹兒以餉仕謨先吮其目恬然不變色黎人憚服遂受撫

登芙蓉山

偶上芙蓉山山殷朝陽曉直上孤頂高平看衆峯小青翠滿層巒藤蘿覆幽沼始悟人世閒紛紛亦何擾

自述

解組歸田又一秋蕭蕭白髮漸盈頭幸辭案牘除煩惱得
伴林泉託隱幽素侶溪邊來水鳥浮名身外等蝸牛止慚
瓊島生黎穴尙有人將姓字留

沈湘齋集卷第十四終

沅湘耆舊集卷第十五

新化鄧顯鵠湘臯編輯

鄞縣沈道寬栗仲校訂

周按察廷用十三首

廷用字子賢華容人正德辛未進士授宜黃知縣
入爲御史外補僉事參議福建備兵四川進江西
按察使有八厓集子賢性倜儻豪岸不宜於俗嘗
與尙書林俊論道於壺山爲臺諫言事多觸時忌
爲監司提刑請囑不行復不善遷台失權近意都
御史汪鉉構之遂褫職歸八厓集今未見台楚風
補明詩綜及方志所採共得古近體詩十三首四

陣全書目錄顧璘國寶新編以延用爲殿其贊云
按察人豪闊視放言文藻性成早垂鉅篇然延用
自以耿直傳不必以文藻著顧華玉云子賢才
稟超融文鋒迅湧兼能博涉強記滋培詞本故援
筆長賦爛然成章列朝詩選華玉於子賢極相
推挹然其詩粗豪奔放往而不返蓋楚士之有才
情而不諳於格調者靜志居詩話八里放言性
俗東橋深惜之國寶新編以之爲殿贊云文藻性
成早垂鉅篇然
求其鉅篇頗罕

池上晚坐

皎鏡淨方塘月波涵一碧
激灩照修竹風聲鳴瑟瑟
愛此澹忘歸呼童卷湘帙
清籟動我衣微露潤我噴
繁星燦羅列羣鷺久復寂
冲曠得所怡稅駕將何適

春晚事隙偶作

吏道謝迫束凝神悅閒敞
縱步緣階除流目睇林莽
荃蕸

吐芳蕤山泉發幽響風聲褰閒帷月華洞虛幌伊予奉王
命闕歲居邊壤繕筆忝所村鼎食規厚享英達久睽攜謫
薄逾迷罔且自飫丹經聊以遂偃仰

閒詠

寂寂抱空虛暇日阻遊豫散帙博餘清沈瑟銷遺慮纖榮
吐芳升弱華裒清曙丹葩懼春曦白楊號日暮層空翳歸
雲修岑曖行霧引領洞庭水徘徊不能去借問此何爲嬰
以世網故柱下徒栖栖功業未由樹悵哉攬轡志漠爾埋
輪路休澣循予勑且誦閒居賦

過倒馬坡

未識埋輪路重經倒馬坡赤霄開棧道白日蔽雲蘿古蹟

羊腸遶飛泉鳥背過張生銘劍閣千古仰嵯峨

至徐州

遠戍收宵柝高風動雪車三年同旅鴈一飯厭河魚赤葉寒林曉黃茅野市虛因思溪水上在昔臥深廬

次水峽驛

隔岸長風吹白波蜀江千里暮愁多嘯猿每聽三聲下飛鴈難逢一字歌滿眼黃塵馳羽檄幾時滄海問漁簑夜深月上灘聲靜時有巴渝發棹歌

登岳陽樓步朱凌谿韻

獨坐高樓望洞庭樓前波浪畫冥冥雨來湘漢兼天黑雲去巴巫擁地青仙子傳書孤鶴下山人吹笛老龍聽兼葭

零落芙蓉冷誰采香蘭弔屈靈

攢宮

宋家陵墓滿空山北望蒿邱路險艱一代龍蛇逢末運百
年鳬鴈出塵寰空聞玉棹金城返不見旌旗瀚海還無限
鼎湖湘水怨白雲斑竹淚潸潸

經廣武城

廣武城邊草樹青濁河波浪畫冥冥天呼垓下真龍起事
異鴻溝白馬刑日晚沙場留返照秋風燐火亂殘星英雄
自古功無敵阮籍狂言未可聽

過灤東

灤東灤西雲日晴官船撾鼓上灘行不憎檣燕風前語最

愛山花雨後明杜甫草堂元地勝孔明圖陳自天成明朝
澹瀕瞿塘上卻望連雲棧閣橫

夜泊岳陽樓

水動沙虛月色浮孤舟夜傍岳陽樓天空避鴈來度浪
靜抱珠龍出遊湖海放歌聊對酒鄉關聞笛易生愁君山
縹渺虛無裏欲躡風雲到上頭

洞庭舟中聞鴈

瀟湘鴈來今幾時洞庭雲水鎮相宜傳書列字征心急殘
葦折荷歸思遲度月關山應獨苦銜蘆縮繳已先知呼雲
政爾聲聲切吹笛高樓何處思

大江晚渡

洞庭湖邊吹晚風孤雲殘日隱長空一聲鴻鴈撼蒲裏無
數人家蘆葦中傷水酒漿那可覓隔溪魚蟹孰能供茫茫
江海關舟楫何處滄浪有釣翁

孫副使繼芳

六首

繼芳字世其華容人正德辛未進士除刑部主事
改兵部歷員外諫南巡廷杖尋遷郎中出爲雲南
提學副使有石磯集華容孫氏自副使至子雙先
生凡五世皆以文學顯其曰洞庭漁人集五十三
卷者副使之子宜也其曰園居鳴缺浮湖北遊等
集者副使之孫斯億也其曰遂初堂集十一卷者
副使之曾孫羽侯也其曰古微書四種今所存刪

微一種三十六卷者副使之元孫穀卽子雙也副
使官刑部時東廠獲數人誣爲盜下刑部論法副
使鳴其冤出之旋因疏救御史張璞劉天和王廷
相不報卽謝病歸起職方司又偕武選郎黃鞏率
諸寺屬百餘人力諫南巡捕繫廷杖幾死時武庫
郎陸震死杖下裹瘡力疾治其喪其風節如此詩
其餘事也

送徐太史使遼府

節重天王使情親帝子家雲霄三殿詔波浪九江槎庾亮
樓前月湘娥廟裏花金樽高宴罷須擬弔長沙

嵩明次韻

海畔青山山上城野橋村巷接昆明峯開林木千章秀水
抱沙田十頃平蠻井夜深人未定炎洲霜後瘴還生飄飄
萬里西南路莫採芙蓉愴獨行

新添次韻

倦源沂盡水西頭欲採汀花賦遠遊巖徑曲盤千嶂入野
橋斜度一溪流明星擁旆連宵發暗雨回車信宿留望斷
遙空征鴈沒片雲何處是江州

北征還朝凱歌

羌兒誰犯屬車塵聖主西巡秋復春毳幕欲知酣戰苦六
宮金甲未離身

牙旗寶蓋耀星文騎鹿牽羊總百羣二十四通催羯鼓帳

前齊賀大將軍

上卿捧檣貳卿持主將開筵副將隨酒盡燕京雙琥珀天
顏如醉映花枝

范布政輅七首

輅字以載桂陽人所居有三峯因自號三峯正德
辛未進士授行人擢南京御史清軍江西以劾宸
濤及鎮守太監畢眞被逮下獄謫龍州宣撫司經
歷再起終福建左右布政使公爲君山僉事從子
風節素著官御史時以武宗無子偕同官請仿朱
仁宗故事擇宗室賢者育宮中不報先後劾中官
黎安劉瑯及衛官簡文王忠罪又論馬姬有娠不

當入宮語皆切直甯度人令諸司以朝服見公不
可奏言尊無二上凡不稱臣不宜具朝服以嚴大
防廷議請如公言濠伶秦榮僭侈公劾治之又劾
畢眞貪虐十五事眞乃據他事誣之遂逮下獄淹
繫經年始謫龍州經歷未幾濠及眞謀逆誅御史
謝源等交章薦公未及召世宗立始復原職累官
江西副使致仕歸又用胡世甯薦起密雲兵備副
使以討礦賊功轉福建左右布政使卒官未竟其
用而剛譽直諒爲天下所服詩有三峯二京宦游
等集清夷委婉不愧有道之言

范以載三峯二京
集自序三峯輅舊

隱處也二京南北都會地也輅自侯罪龍州以來
因謫所聞寂常靜思及歲月倏遷家園遶絕故舊

參商義理晦饒悵然有惜往日意閒中因檢閱舊藁自辛未至己卯寓京師所作存者若干首釐爲四卷閒有一二去國後所作亦錄之用識處江湖不忘廊廟意也

古意

夕陽天外路萬里極迢遞思遠致心勞眷言亦出涕
光陰若水流百歲隙駒過捐棄在中道自貽此坎壈

次韻送楊太僕恆叔乞歸

聖世能辟祿陶園欲致身

原註楊號陶園主人

江湖萬里渺花柳一

時新簪紉情應斷漁樵跡自親遙知感興處林下拂詩塵

遊靈谷二首和同年張汝立韻

草鷁迷野徑山簇暗煙蘿吠客犬聲遠明眸花影多三春
空俗慮此日亦狂歌長嘯清風下人生能幾何

石室留雲住。籃輿傍砌行。山光連遠近。谷口半陰晴。麋鹿驚塵鞅。箏簧雜水聲。浮生真若寄。何日始逃名。

奉寄仲父君山卽次來韻

故國分攜又幾秋。天涯凝睇上高樓。遙遙白雁數行沒。隱隱青山一點浮。天爲滇南聊暫駐。吾於身外又何求。釣船曾憶東溪水。疏葦蕭蕭芳草洲。

題仲父君山威州生祠次韻

荆榛何處尋棠樹。雅詠令人憶召南。白首已悲千里逐。赤心終見遠人譖。兩年賸有江湖念。七尺應無俯仰慙。門第後人增感慨。威州廟貌枕寒潭。

巡按江西忤甯藩被逮虔州

累疏陳愚自速尤忽干天怒械虔州誓將骨骸供臣職敢
學脂韋爲已謀羈絆已如籠裏鳥功名眞若水中漚分甘
萬死無難事恐重高堂鶴髮憂

周尙書敘二首

叙字子厚九谿衛人正德辛未進士授大理寺右
評事晉左寺丞以諫南巡廷杖謫永嘉丞附見明
史夏良勝傳世宗登極錄故諍臣起擢韶州府知
府轉四川按察副使歷山西按察使陝西左右布
政使召爲南京都察院右副都御史尋總理宣大
戎務入爲大理寺卿戶部侍郎提督太倉改兵部
晉工部尙書督理沙河大工以董修九廟失事貶

侍郎尋以英異自陳致仕家居二十餘年卒尚書
之先居河南息縣世職千戶成化時改隸九谿衛
遂爲九谿人父璧慶符知縣尚書生有異質猿臂
善射不拘小節而博學能文其謫永嘉也張文忠
尚未第尚書奇其才可大用敬禮甚篤卒引與同
升而晚節果於勇退世推重之卒祀鄉賢所存詩

少僅見二首

按明詩綜載舒公芬首犯逆鱗幾斃
杖下其撰崇德李君墓志本末最詳

謹鈔錄於左始車駕議以三月十九日壬子東巡
歷徐揚抵南京下蘇州復沂江浮漢登太和山人
情恟恟懼變十五日予率同館先上疏是夕夏良
勝于中萬潮汝信過余憤惋邀太常陳九川至署
名明日諸臣連疏入車駕不果出矣癸丑上忽震
怒下黃輩夏良勝六人於錦衣衛獄以芬等百有
七人跪午門外五日乙卯余廷璜等俱下獄丙辰
同黃輩等六人亦跪午門外五日梏桎是日工部

林大輅等三人大理寺周子厚等十人亦連疏入
丙辰俱下之獄亦枯季跪五日戊午芬等一百有
七人午門受杖四月已卯杖輦等六人林大輅周
叙余廷璜俱受杖時死杖下者陸汝亨劉宗夏及
李崇德十有一人其文比之實錄所紀尤詳
所云周子厚者即叙也亦見明史夏良勝傳

仙侶洞

挂壁虬龍路可援石扉斜處恍通軒不須北渚招黃鶴誰
遣西湖喚白猿五嶺自來多謫宦九溪何處是仙源欲尋
漁父滄浪處問向空山山不言

崖傍溪城東復東層雲絕壁倚虛空乾坤老矣新秋月草
木悠然暮夜風坐石煙花空有跡入爐丹藥竟何功向來
一枕遊仙夢可識蓬壺指顧中

陳參政能一首

能字大用華容人正德甲戌進士官延平知府以
平賊功陞廣西參政

已公菴

山深雲作雨石淺水生花古樹欺霜霰僧耆閱歲華浪遊
仍作客幽隱更無家擬約浮邱伯同來咽紫霞

范布政永鑾一首

永鑾字汝和號蘇山桂陽人正德甲戌進士授江
西貴溪知縣擢浙江道御史巡視長蘆鹽政巡按
四川遷福建按察副使改陝西兵備副史河南按
察使四川右布政使桂陽范氏自君山按察淵以
載布政輅同時並起皆以忤逆瑾叛濠被逮左遷

天下賢之蘇山由縣令行取御史所至有聲歸後
購經史書籍數十種貯學宮備士子觀覽著有燕
射古禮仁愛錄律例解諸書亦賢者也邊廷實有
寄范蘇山詩云君山久歸地下燕泉更在天南落
落故人如此蕭蕭短髮何堪廊廟江湖身世後先
憂樂心情本是仲淹孫子往來中外知名其見重
於時如此

題朱氏醒溪亭

峭峽迴青嶂虛亭俯碧流林花連綺席鷗鳥下春洲
鑿水浮杯入開軒縱鶴遊主人醒道眼常嘯坐消憂

鄧太僕尙義二首

尚義字以正永興人正德甲戌進士初任延平司
李改廣信行取歷吏部四司擢太僕寺少卿年未
三十遽以病乞歸有東澤集

蔡孝婦祠

漢世淳風尙未亡閨門能自植綱常百年獨老孤鐙影萬
死猶持二老喪返火信應天默佑遺休長與日爭光紛紛
弱草輕塵輩過此甯無一感傷

龍耳嶺

層巒疊嶂幾千重碧色摩霄點翠濃中夜遠銜滄海日半
空平揖祝融峯尋常霧雨棲文豹倏忽雲雷起螭龍要識
淵居天聽邇豈惟靈秀此閒鍾

蕭都御一中一首

一中字執夫華容人正德丁丑進士除新城令擢御史爲大禮諍臣又疏援馬祿逮繫獄貶廣西照磨起南刑部郎復以任新城時事再貶饒州通判尋以霍韜薦陞平樂知府累官至都御史巡撫四川剛直廉介所在著名詩僅見一首

偶題岳陽樓壁

百尺扶筇上孤城面水開重湖浮七澤飛閣湧三台往事懷先哲時艱屬異才登臨無限意牢落且銜杯

徐提學一鳴十二首

一鳴字不傳醴陵人未齋郎中廷用子正德丁丑

進士官禮部主事吏部驗封司郎中與爭大禮出
爲江西提學復以毀淫祠忤闕謫松江同知旋乞
歸擢南刑部郎不起有淶江集提學詩所存不多
七言近體高爽質亮聲情斐亶在七子中最近王
李吳明卿輩或不如也明詩綜輯丁丑一科詩自
舒修撰芬以下凡二十三人獨無提學名自來選
家皆不之及吾楚人亦無有能稱道之者乃并其
字不傳可嘆也

秋懷

日落空庭映晚霞并梧籬菊競年華天涯歲事催寒杵客
裏鄉心急暮笳郭隗臺荒悲薊野賈生祠古憶長沙漢京

冠蓋豪遊地快馬輕車意自賒

岳陽樓倚洞庭湖湖上風煙畫有無不見吹簫來碧落尚
聞飛錫到元都江濤影動龜鼉宅岸荻聲迴鴈鷺呼腸斷
十年臨眺處向來歸夢落秋蕪

長陽宮館禁城西先帝宸遊路不迷金殿晝閒扃虎豹玉
池春靜浴鳬鷺風雲尙想冠裳入日月曾瞻簇仗齊千載
翠華那更見五陵秋色益淒淒

白日清沙動碧虛秋風江上憶吾廬門開列岫丹青見徑
隱千花錦繡舒晴嶠煙霞違杖屨夜來星斗靜琴書不知
身世風塵裏猶向他鄉問卜居

考皇弓劍杳難尋報祀曾趨寢殿斑豈有金鐙朝地下尙

餘玉燭照人閒風生瀚海蛟龍泣日落空林鳥雀還最是

宮庭更蕭索淒風殘月對愁顏

按考皇二字疑當作先皇或以當日稱孝宗爲皇伯考故有考皇之稱詩意悽惻哀愴在爭大禮諸

臣中倍覺慷慨結語意指慈壽太后尤爲沈痛

憶昨衣冠哭帝庭忽看白日下雷霆鴛鴦影靜明星晝
狂陰生曉霧冥被繫鄒陽終遇主抗言劉向本傳經牽裾
折檻千年事吟對秋山幾涕零

按提學爲大禮諍臣與撼門大哭二百二十九人之列見明史何文簡傳此詩蓋紀實也

張龍湖宮諭賡東宮詔賚於諸藩還贈送

江城晴日動征橈詞客乘春返使輶金殿蚤承金馬詔玉
樓新品玉鸞簫相如才雋應光寵杜甫愁多漫寂寥京國

故人如問訊爲言生計有漁樵

原注張是有婚事

夜夢至一公署觀吾師甬川先生壁閒詩紀述一首

秋夜離懷攪客眠覺來塵跡尙依然書疑逸少臨池日

夢中觀公書疑若不類詩異坡翁過嶺年几杖每憑魂夢旁一人云茲公新筆也

到文章應共姓名傳青宮紫殿逶迤地遙望雲霄霽景懸

春夜簡唐達溪

春來池館夜偏寒偶把新詩續舊歡塵世苦逢知己少閒身猶荷聖恩寬窮愁阮籍嬉遊簡歸去陶潛應接難三徑肯判過二仲朱絃還擬爲君彈

聞東潭涂侍御於滕王閣旁構一樓曰覽勝因感舊

遊奉寄

畫棟朱甍倚碧空元龍豪氣此從容
窗開南浦蒼波湧簾捲西山翠黛重
繡戶笙歌喧鸛鶴瑤臺燈火託魚龍
羨君珠履樓頭客似少山翁一短筇

千年遺蹟至今留錦席瑤觴記昔遊
歌詠總輸王子賦登臨曾抱范公憂
久從南國瞻高士誰向東陵識故侯
俛仰因君成慨嘆夢魂長共水東流

春日感興

滿座雲山列翠屏華胥國裏夢初醒
桃花日煖添紅漲蘭芷風清薦渚馨
霄漢曾瞻仙掌露江湖今作老人星
行吟澤畔誰相和醉裏漁歌爛漫聽

丁麟遊淑二首

淑字師孟醴陵人正德丙子舉人初官寶豐教諭
以才擢麟遊令未三月與上官忤即自劾歸嘗識
張文毅於微時文毅既貴遂師事之又嘗掘地得
金盡以予里人作散金歌紀其事有集未見

丁仙觀

洞天杳杳白雲深踏遍松風十里陰酒向村沽防市遠句
隨樵響過江尋步虛聲繞花邊斗流水春生月下琴回首
畫橋人影散銀牀深掩漏沈沈

南屏

南屏削玉當湘矗瀑布如花洒壁斜棧石截雲遮鳥道機
聲出樹有人家河橫午夜潮歸海斗指中天月散華鋤遍

心田漚滄水道人亦自有生涯

萬同知松一首

松字藉山武陵人正德丙子舉人歷官龍游知縣
蘇州府同知

秦人洞

白馬江頭古洞邊問津曾繫釣漁船重門鎖霧不知處老
樹著花今更妍瀛海未歸青鳥信山亭空對白雲篇乾坤
滿眼蘼蕪裏獨立仙壇一惘然

李郎中旦一首

旦字溫泉永興人正德丙子舉人授深水縣教諭
遷績溪知縣歷官戶部郎中祀績溪名宦亦祀鄉

賢

蔡孝婦祠

塵劫茫茫歲幾千，尙餘節孝世爭傳。
天教憲節新祠宇，歲走鄉人酹墓田。
故宅昔嘗旌異代，芳名今更煥遺篇。
綱常萬古須扶植，一度經過一悚然。

謝經歷時一首

時湘鄉人正德間貢生官經歷

龍興寺

曳杖隨鴻影，尋溪候鹿蹤。
霧蒙龍隱洞，月冷鶴歸松。
千尺林閒塔，數聲閣上鐘。
上方金鎖寂，不倩白雲封。

沅湘耆舊集卷第十五終

沅湘耆舊集卷第十六

新化鄧顯鶴湘舉編輯

鄞縣沈道寬栗仲校訂

張文毅治一百一十首

治字文邦茶陵人正德庚辰會試第一明年嘉靖
改元改庶吉士五年授編修歷左右春坊左諭德
翰林學士擢南吏部右侍郎召改吏部左侍郎尋
改左侍郎兼學士掌院事拜南吏部尙書改禮部
尙書兼文淵閣大學士入閣預機務加太子少保
謚文毅公博聞強識明習典故性介峻尙氣節議
論天下大計侃侃無少顧忌通籍後值張桂用事

不樂就職家居十三年而後起既登朝銳然以辨
邪正明黜陟爲大務汲引善類如不及尋典台銓
預機務時承平日久中外恬嬉會三邊有警公憤
言於朝曰今兵老民棘禍旦夕及肺腑諸公不歷
筭周思爲宿謀而釀成疽根其可久乎又云今天
下之弊患在士風瀾倒如水決防天下乾耗經費
無紀士習靡則元氣漓民財耗則精血罄將何所
底止言甚切至卒蔽於方士權輔訖無所濟恒歛
歔額感慨然喟嘆卒之敵騎充斥一鏃莫施始服
公言非過慮而公已病革矣方事急時公疾篤猶
伏枕惋泣力疾草疏欲堰白河水以遏敵騎會憊

不支而卒初公入閣時廷推六人世廟持之十日
乃下蓋特簡也公卒後世廟猶疑其不盡言諡之
曰隱隆慶初始改今諡公同里彭贈公思魯言嘗
聞之故老云公未達時慨然欲行所學既貴恒鬱
鬱不樂當食輒嘆息疾革猶惓惓時事孤忠亮節
無愧古大臣而媚嫉之臣軼其事於身後當時紀
載家亦莫敢昌言稱述故世第稱其自劾及籌邊
定會典數事其餘僅傳述於鄉里故老之口而事
莫得聞明史亦不爲立傳諒哉斯言斯足以概文
毅之生平矣公有龍湖集十五卷其曰龍湖者以
州有龍化湖長老數言故有龍湖坼榜元出之識

公嘗憩而樂之因以龍湖自號正德己卯湖忽涸
明年公舉進士第一讖言遂驗天下稱之曰龍湖

先生公詩體裁正大詞旨悱惻以之嗣響西涯殆

無愧色

豐城雷禮云公片言隻字流布於人者類

之氣又云

公文若詩多切隱憂覽之令人省奮

武進薛應旂云

先生直躬正氣侃然不同而好善

嫉惡無少假借

詩文皆根諸性情理道光明後偉

一洗菁藻浮華之習

漢陽陳栢云先生風節凜

凜係天下之望

凡有所作屬興而就伸筆滿紙不

為婉昵細語不尚藻飾

比擬而終不可及王元

美云張文邦如藥鑄鼎

深燭驚人顧元言云文

殺才雄思瞻抽緒錯彩

炭然衡嶽之秀同里彭

思存云先生歷主文柄

多崇獎經術士如歸震川

薛方山諸先輩皆出其

門而震川破指授尤頻數

故生平知已之感獨於

先生三致意焉今讀其遺

詩渾厚深醇古雅森峭

可因其言以想見其人

附錄降慶改元更諡諡

曰惟爾太子太保禮部尚

書文淵閣大學士事我先

皇帝三十餘年隆恩厚

邱君居之義不終始矣問於媿娛之臣易名未當
頃有言者朕下禮官考論其世以爾詞尙理要制
作渾雄心存世務議論慷慨考文章以知入如陸
贄之識韓愈因公正而發憤若汲黯之斥張湯引
以同升悉爲今日之率輔與之異趣實乃當時之
大茲是以朝廷服其節慨天下想其風采昔我先
正良用懷思不有嘉名曷稱輿論是用諡爾文毅爾其不昧尙克享此

入山

山水諧夙心林行豈云遠草深谿谷幽石出寒流淺秋風
吹白雲千峯淨如捲塵事甯足勞初衣念將返

出山

貧奇事攀躋邱壑自成趣鐘聲滿寒松日落萬峯暮流泉
不出山歸雲還依樹雲水何瀼澗遊人獨歸去

秋夜與永甯諸宗老話舊

天清木葉下日沒孤鴻翻舊壁寒鐙細高城白露繁湘江
照錦席穠谷莽平原飛鳥戀故里靈芝有芳根十年江海
意一笑藉金樽

熊峯篇

熊峯何崔嵬鬱鬱青霄閒巘岈輒地軸橫絕凌天關神秀
鍾混茫蒼色橫平原日遠浮雲征可望不可攀上有姑射
仙容耀何鮮妍方瞳冰雪肌白髮被兩肩朝采南澗松夕
息西山煙縹緲登閭風擢髮窮沔盤文虬翼承折格澤紛
驅先拂日擘珥枝紉佩垂秋蘭悠然返初服逍遙以盤旋
憶昔奉明主辛勤自歲年宸樞發天惠劄鑑升才賢斗柄
酌元化四氣隨敷宣抗志填陳力危詞激謬愆鏗鏘金石

聲矯矯驚鳳鸞之機有代謝物化終難遷豺狼馳我後
鳴我前君子守貞性進退無刊湖松栢生深林歲晚不
改堅盈虛尙至理聖哲洞其端所貴在明德義命良可安
蹇子抱弱質慕道心嬋媛蓬麻幸附倚薦蘿亦相緣豈不
懷高躅道路阻且難采采澧中芷思之不能言敷衽陳此
詞咽然惻肺肝

秋江雜懷二首

翩翩雲中鳥歸飛薄叢林日落天雨霜回波清且深
子陰翳高壁草際寒蛩吟方舟在萬里離索故難任黃鳥亦求
友誰不懷所欽仰以觀列星俯以調素琴列星光且繁素
琴有遺音星光照我衣遺音傷我心

侵晨理行役微風蕩輕舟顚景散林薄熹光明素流川后
息驚波海若靜不游揚波出遠渚舉目眺遐邱猗彼蕙蘭
叢含英被芳洲采之盈懷袖將以遺好仇路遠終莫致糾
結心沈憂

送黃汝明歸長沙

南陲迎修景大火迴朱維溫風動纖綵輕雨流清漪徘徊
攬行轡薄言出郊圻旦發燕門道暮望湘江湄桑梓戀故
域萬里遙相思踟躕蹊路側惻惻不能辭念子日已遠何
以慰渴饑願言茂明德策足青雲達干將與莫邪會合自
有時丈夫志四海別離安足悲

贈陳原習御史謫海陽

南國有佳人容耀何鮮妍雙環繡羅襦寶髻金珠鈿結髮
事良人貞諒以終年辛勤理容飾寒機拭朝煙一自新懽
移舊愛中棄捐愴惻出門去涕下如流泉沈憂結束腸區
區誰可宣妾心苟能明妾命誠當然舉頭觀列星低頭調
素絃列星光苦繁素絃長自憐

西麓

九京不可作西崙空崔嵬寂寂邱中阿綠草生兮臺女蘿
覆石壁日夕清猿哀條枚鬱重林霜落天風來誅茅晚結
搆白道山前開匪因藉虛觀聊以紓永懷

夜過洞庭

曉發武昌門夕渡黃陵汜日暮江帆遲洞庭八百里微風

澹無波明月照天水隱隱見君山鐘聲翠雲裏樓船坐中
流長歌白波起

靜志居詩話吳有洞庭山名也楚有洞庭湖名也
郭景純賦云爰有包山洞庭巴陵地道潛達旁通
幽岫窈窕蓋謂君山有石穴通吳之包山故包山
亦名洞庭山酈善長注水經二湖俱以洞庭為目
誤也張文肅夜過洞庭詩云曉發吳閶門夕度廣
陵汜日暮江帆遲洞庭三百里微風澹無波明月
照天水隱隱見君山鐘聲翠微裏是吳地也而混
於楚矣善長北人未析南條諸水文肅家茶陵與
洞庭湖密邇豈得以君山屬吳耶按四庫全書
目錄云朱彝尊靜志居詩話嘗摘其夜過洞庭一
首以吳地而混於楚且云文肅家茶陵與洞庭近
何得以君山屬吳今觀集中是詩固未誤也豈彝
尊所見乃翻本耶按文肅
後復改謚文肅

靜谷同林北泉兵憲宴集

春山懷伐木挂席滄波流有美林節使招我靜谷遊窈窕

入蒼徑丹梯躡阻修飛泉洒石壁萬壑如鳴璆長松挂白日翠色不可收遙阡翳荒莽言是昔賢邱東風吹白楊萬古青悠悠貪奇歷重險倒影臨深幽仰觀衡嶽秀俯瞰湘江浮已諧塵外想况有同心儔怡然覽昭曠一笑豁凝愁
河西草堂爲童內方乃兄賦

君住玉沙湖雲構涵虛敞荷露凝清香竹風動幽響月華川上來煙水平如掌深居澹無營悠然謝塵鞅閉門卧高齋不知春草長竭來燕市遊驅車何慨慷細雨懸孤帆青山還獨往我家瀟湘東林巖亦蕭爽三年縛纓裾懷之空悄悄衡嶽千萬峯因君發遐想幾時湖上歸與君弄蘭槳
荊州寄王江野給事

嚴風振廣野青旌指前林緬懷同心友一別湖湘深黃鳥
尙求侶女蘿附喬陰矧茲良覲阻甯不傷予心皎皎松際
月泠泠花閒琴清光映瑤軫此意誰能任秀彼澧中芷馨
香盈懷襟采之欲何爲將以遺所欽路遠終莫致惻然淚
潯潯

送黎主政監稅杭州

王政先理財國家重賢託誰以舟車縉謂非經濟略况茲
多事秋此道豈云惡嗟彼劉晏名千古不可作感時百憂
生送君淚欲落白下春雨深江寒柳條弱征旗指前林別
緒增離索十年門下人恩深義匪薄愛子冰雪心青天照
琴鶴吳越山水鄉樓臺秀雲壑西湖如鏡明應知有餘樂

竹溪悲

君不見瀟湘萬竿玉君不見洞庭千頃秋蒼蛟夜蟠風雨
黑龜鼉日抱青天遊三年仗劒事明主君山衡嶽空回頭
長安六月紅塵浮竹溪竹溪何清幽安得載酒竹溪去醉
卧瀟湘看白鷗

燕臺送季仁夫令新律

燕臺白露悲秋草美人欲去傷懷抱歸帆正憶武昌魚
驅車還上巴山道巴山嵯峨倚空碧劍閣千尋瑩青壁玉
壘晴風一鶴幢錦城夜月雙鳬舄連雲鳥道不容幘念子
行亦何遠對酒高歌行路難願君努力加餐飯

河橋篇贈計大守還蜀

河橋楊柳窺春草使君去去巴山道野昏雲慘溪水寒饑
烏啄雪梅花老昔聞巴山之道高崔嵬峨眉劍閣青天開
舟人相呼不相見百丈牽雨江猿哀使君何爲去太疾淚
痕獨洒西風出一片孤帆棲碧煙十里青山下落日送君
泅江潯泅江不似離愁深回首甘棠滿地陰相思明月懸
空林

送趙東竹僉事之江西

憶昨相逢京國時吹鐙愛讀西曹詩彈棋看劍懽未已斗
酒那知成別離豫章城中花萬樹使君獨領春風去燕水
吳山一萬重日暮孤帆向何處章江千尺照匡廬下有白
鹿仙人居褰帷杖鉞應多興須寄臨流雙錦魚

送黃時敬令江西因簡秋潭

秋潭別我湘江渚三月殘紅落如雨回首湖山萬里雲日
暮天南獨延佇隔年始見黃生來封書遠寄黃金臺開緘
見書何所有上言生有圭璋才黃生黃生真可羨牛刀且
試江西縣春滿河陽桃李花好歸侍從承明殿

送郝太守山之溫州

五馬金絡頭長鳴向東甌東甌山水甲寰宇北斗上指天
河浮二十八井澄空碧海壇春暖沙光白孤嶼花明西射
幽王謝風流自今昔君行莫上吹笙臺綠煙日暮迷荒苔
江心古剎滄波裏感慨須憐異世才

送王石沙御史按閩

閩南路幾千交州更萬里君持繡斧向三山予亦乘舟渡
湘水長安六月送君行酒盡長歌爲君起丈夫志四方齟
齬何爲爾匣中寶劍照人寒江上旌旗拂煙紫玉驄嘶雨
麥花浮錦帆挂日天風駛直看炎海無驚波歸來笑揖承
明裏

送大司徒夏松泉之金陵

昔年共作金陵客秦淮幾對春山月南北風煙逐轉蓬鶯
花又是長安別留京宮闕倚天開江流曲繞鳳皇臺地曹
舊署連東省入座聲華接上台君才磊落莫可匹廊廟此
日須夔稷僕夫遲遲且勿亟天子召命應在卽

白溝河

白溝河水浩浩昔時戰爭場今成車馬道向來棄骨不可收
千古殘魂哭秋草白日照地寒雲黃一溪落葉無人掃
世事悠悠甯足論過客空悲天地老

鐘石歌爲費子和贊善作

懷玉峯高幾千尺百里岵嶺墮空碧信溪東來盪清澄突
兀江雲見鐘石鑿鍾不假鳧氏工厓根直插蛟龍空峽色
中含翠琰琬波光倒映青芙蓉學士習年棲碧山愛從鐘
石看潺湲弄花草閣圖書濕踏月江門杖屨閑十載聲名
動天子呼來復入承明裏翰苑班聯玉筍高講帷炬映金
蓮紫清風黃閣驚湖翁小阮詞林亦擅雄補天障海君復
爾勛華鐘石同穹窿

贈史給事出判通州

燕京木落秋初深
高雲白鴈寒蕭森
玉壺載酒送君去
千里青山愁夕陰
我欲贈君綠綺琴
一彈一曲傷人心
海門月出江煙薄
惟見滄波澄碧林

送陳宗器令於潛

錢塘江上潮如山
於潛遠在湖山閒
共言地僻少逢謁
况復民淳訟獄閑
爾家三世總爲令
前輩風流猶可攀
惜爾讀書破萬卷
得官今已成蒼顏
故人客邸喜相見
嗟我旅久頭顱斑
都門送爾轉愁思
回首孤雲天際還

送徐道正判晉州

已惜逢君遲
還悲別君早
燕京風已寒
白露滿秋草
君去

鼓城三百里驅車曉渡桑乾水京觀花翻竹馬高西山樹
繞旌旗紫君乍承恩出鳳池銀章墨緩人爭奇十年始稱
平生意勲業須酬明主知

贈芝山山人歌

芝山山人來武彝自言曾上看天池層巒沓嶂不可數香
爐五老青嶺疊丹梯千丈倚空出下有三級泉倒垂奔流
直瀉落絕壁龍跳虎躍猿猱悲攀蘿杖策訪白鹿林深石
滑顛岠嵒棲賢橋頭弄明月醉歌擊斷長松枝聽之發我
胸中奇臨風欲呼黃鶴騎周遊六合覽八極南窺衡嶽窮
九疑羅浮四百總煙霧岷峨積雪連須彌西躡太華尋紫
芝三花少室紛離披太行王屋幾千里漁陽上谷黃塵起

沙磧雪寒羣馬嘶日暮殘兵哭遼水蓬來碣石遙相通秦
山齊魯青不窮坐觀日出扶桑東海上萬點金芙蓉石梁
雁宕排長虹會稽下瞰神禹宮沃焦天姥俱濛濛卻捲几
曲胸懷中歸來濯髮晞天池竹林洗剔顛仙碑九華瀟霍
相追隨倒蹴彭蠡掀鯨鯢上扶乾軸迴赤曦下盤鼇足甯
坤維天吳九首僵不飛頓令四海還清夷吁嗟丈夫志氣
吞五嶽安能跼蹐徒爾爲金焦夜深老龍語洪河浪沸蛟
龍舞山人山人且莫歸長嘯與爾傾金罍

江光閣

獨上江光閣窗開而面幽月明已樹近天闊海雲流水雪
千山暮煙波萬里舟懷歸王粲賦回首不勝秋

望壽山

石路沿流水江村帶古隄口迴雙徑合天抱萬峯低地險
連吳楚碑殘識宋齊蛟龍深窟底風雨忽虹蜺

廖白石以詩見寄會童元白亦有書來愴然成感依
韻賦此因則敬寄去

昔年陪二妙翰墨會詞林一別違相見尺書勞遠心萬峯
生暮色孤鴈下秋音塊坐悲明月蒼山白露侵

夕蟬號落葉白露滿秋林一片湘山月空懸萬里心寒蟲
那可聽鄰笛亦哀音幽獨增長歎相思白髮侵

江上

的的蒼江近行行故國通危橋留落照遠樹度高風鷗立

沙分白花飄水借紅琴書隨嬾癖吟意浩無窮

天柱閣

皖公城下水高閣倚天開山岳樽前出江湖席畔來星浮
千島助天壓萬峯迴欲作登樓賦誰如王粲才

江宿

移舟初極浦倚岸卽斜曛澹澹月臨水微微星出雲流螢
散高影暗水聚寒蚊山雨中宵至淒然不可聞

中秋無月

待月孤城夜秋風動芋蘿陰雲天際重妖翳眼前多霄漢
黃金殿仙人白玉珂淒涼瞻望地嗚咽不成歌

定林寺次易舜山韻

下馬秋山寺，雲林第幾重。
碧寒臨近水，青遠見孤峯。
短徑荒苔合，空簷古木封。
舜山有佳興，吾意亦從容。

寄高竹泉

籍甚瀟湘縣，風流高竹泉。
鳳皇鳴曉日，鷹隼在秋天。
桑柘千家靜，絃歌一邑傳。
慚予空落魄，歲月故人憐。

吳集市

吳集百家市，回鄉十里村。
樹荒兵燹地，血黯戰場痕。
新鬼時聞哭，貧家今幾存。
無端悽惻意，獨坐向黃昏。

湘中憶鄭栗齋憲僉

細雨春帆溼，孤舟江色閒。
岸花當水出，沙鳥傍人來。
綠草湘妃宅，青山帝子臺。
湖南霜氣重，遙憶子真才。

赤壁

赤壁周郎渡清江蘇子臺林亭依綠水石磴入蒼苔銅雀
興亡憾金甌際合才乾坤餘舊跡惻惻古今哀

石鐘寺

古寺依危石殘僧住薜蘿江聲流楚合山色入吳多鸛鶴
巢雲樹魚龍蟄水波天涯孤客思停棹一相過

夜懷用南田韻

天遠聞鴻鴈樓高憶鳳皇鬢秋搔易短魂獨不禁傷風竹
搖霜色寒花卧晚香長吟忘夜永明月下虛廊

秋日登城樓用南田韻

城臨孤壁迴樓出萬峯開嶺勢銜天闊江形抱楚迴野風

吹日落霜鴈切雲哀直北長安道憑軒首獨回

清溪阻雨

客愁已若此况聽雨聲多潮氣連滄海江光湧白波
暝雲低野度溼鳥掠船過咫尺齊山色蕭蕭鎖薜蘿

渡淮

南風淮水上細雨短帆開山入峒嵒盡江浮濟泗來
煙波蹤跡遠歲月鬢毛催萬里長爲客湘雲首獨回

秋夜

涼露凋羣木禪房起寂寥天聯雙闕迴月對萬峯遙
宵柝龍城靜風鐙竹戶搖故山松桂樹秋去竟誰招

江晚

落日層波迴輕舟帶夕搖長天孤鳥淨殘雪萬峯遙野竹
依寒水江門對石橋多愁雙鬢改應欲傍漁樵

送袁璣司教廣德

鄉國生秋夢天涯復送君遠心連楚塞離思逐江雲道重
陳無已官貧鄭廣文建平儒業舊羨爾續遺芬

送易璜司教饒州

空憶西泉上傷心往事虛傳家今有汝薄命又何如歲月
青羶冷江湖綠鬢疏鄱川千里外野送重愁予

送南城李知事

天涯霜雪貂裘黑古道重雲野樹愁作客風塵皆萬里送
君江海獨孤舟青巾舊說蘇南海白髮今傳李惠州幕府

官閒詩興好定須飽飯對羅浮

懷水南學士

苦憶南州張仲蔚十年抱病卧滄洲文章有用翻憎命世
事無情祇自憂澤國蕭蕭黃葉下關河渺渺白雲流多愁
已似悲秋客况復登樓及客秋

懷前峯司業

可憐多病王摩詰十載長隨鷗鷺羣勲業未教收管樂文
章空說似機雲溪樓明月知誰共江國哀笳怨獨聞霄漢
故人今復幾白門清淚墮秋分

送戶曹郎中陳渠軒考績

初聞奏最入金鑾喜得還家賦采蘭雁引江帆過鄂渚春

步林者有身
隨旌旆到長安十年冰雪看龍劍萬里雲霄散羽翰無那
相逢卽相別白門離思總漫漫

送劉四山別駕還湖州

去年此日吳門路今日還爲白下遊卻笑與君俱作客不
禁歧路甚悲秋天涯涼雨連飛雁江上寒風颭細流湖海
共憐霄漢意五雲回首鳳皇樓

送徐伯元南還因寄淥江兄

幾年不寄淥江書白下逢君感客居江上煙波還送客天
涯風雨正愁予扁舟歲晚蒹葭冷故國霜寒鴻雁疏遙倩
緘詩問公幹碧山幽意近何如

省中元會次陽翁韻

十載長楊獻賦臣
白頭南國歲華新
還因畫省含香處
倍憶金門待漏晨
江海風煙千里夢
石城簫鼓萬家春
春卿獨羨才無敵
每有清詞動縉紳

元夕雪中同石塘冢宰晏集北原司馬次元曾韻

畫堂鐙火會元臣
雪滿樓臺夜色新
塵世百年能幾笑
天涯今夕是何晨
酒杯寒映星橋月
火樹晴輝玉苑春
比席夔龍眞忝竊
東風華髮愧簪紳

承天寄內方

迢遞荆門接帝州
漢江如帶挂天流
玉魚金盃悲前代
翠輦龍旂感舊遊
遙路風煙驚客鬢
美人雲樹隔仙樓
滿城木葉秋光暮
欲寄黃花奈遠愁

龍陽道中寄陽丹泉僉憲

空山落木帶寒雲，草樹微茫路不分。
天闊身隨孤鴈遠，僧閒鐘在半峯聞。
渚蓮露冷紅初薄，巖桂秋深翠正芬。
卻憶昨宵江上月，清光千里重思君。

天津晚泊

天津橋西日欲落，樵爨漁舟集暝灣。
晚市樽罍村月遠，夜城鐘鼓海雲寒。
微風近榻鳴琴坐，北斗中宵倚劍看。
燕樹楚山空有思，不禁憔悴對江干。

謫仙樓

太白仙魂何處招，峨眉亭下草蕭蕭。
青山舊宅自春雨，落日寒江空暮潮。
朱瑟遺音三歎絕，炎荒歸夢一身遙。
玉魚

金盃終塵土紫極丹邱漫寂寥

炎陵

衡嶽南峯迴碧嶂湘流千里連通川冥冥宮闕翳山木
浙秋風吹野田無爲八方順帝則粒食萬國開民天翦
下馬讀殘碣縹渺江漢昏寒煙

晚興

日暮春城風過輕葛巾側倚小亭清殘花自落屏煙細
宿鳥不驚山葉鳴歧路息機塵夢遠林邱習靜道心生
瑤琴獨抱朱絃冷何處芳洲看月明

送萬長史之汝府

十年彩筆隨青館五錫雲章未白頭春暖鳳笙聞玉殿
門

高花影動朱樓東平擬紹賢聲遠宣室重來禮數侵梁雪
賦成才不少嵩雲汴月莫深愁

早朝

桃都聲促金門漏曙色微茫遶玉華宮樹月低還逐馬禁
城露冷欲翻鴉近臣侍直排金鎖中使傳宣出內家朝罷
歸來仙館靜坐看日上紫薇花

送劉田司教東流

銅官秋浦宣城地白髮青氍毹校情琴瑟傍花春日暖圖
書開閣夜燈清晴雲天闊浮廬阜夕照江空見皖城同學
書生今幾在翩翩裘馬自光榮

送翁免朝志感和韻

司馬重來王室重韓琦西去虜心寒義關出處應無愧事
係安危不避難四海冰霜雙鬢白百年勲業寸心丹玉聲
清漏趨承地獨得君恩許便安

送初內賓僉憲兵備河南

汴州秋去息風埃嵩嶽千峯天際開河上霜威飄斧鉞秣
陵山色近樽罍旌旗暮擁淮陽戍詞賦春登銅雀臺中上
地形稱宛洛安危還待濟時才

送元善之金陵

金陵宮闕千年麗春水仙帆萬里開鵲雲邊懸碧樹鳳
皇天畔有高臺月明瓜步潮聲入煙淨鍾山海色來登眺
早傳吳下作英雄應羨幕中才

送木翁閣老致仕

白髮歸來還舊履
碧山又見解朝衣
安危天下誰憂樂
進退人間有是非
蘿壁煙霞今入夢
客星猿鶴久忘機
湖邊草色留春徑
猶接當年老釣磯

康陵

帝業憂勤十六載
干戈南北聖躬勞
傷心宸殿留弓劍
滿目秋原生荻蒿
華表風霜黃鶴語
石林雷雨白猿號
小臣漫憶承恩日
雙鬢蕭蕭感二毛

定興道中用馬太史壁間韻

沙寒草白霜欲乾
蒼藤古樹杳靄閒
馳車天際日無色
行人道上塵如山
浮蹤江海憐衰鬢
遙路風煙摧病顏
驅逐

此生猶未息倦飛雙鳥向人還

徐州次陳水部韻

古郡遙連河上開賢豪陳跡半蒿萊山青雨歇斷虹出江
闊夜深明月來萃墨孤亭還細草歌風千古但高臺綠雲
自鎖雲龍色無復山人放鶴回

漕河阻淺次江午坡韻

漕舟百里水如陸篙師挽卒聲相聞迴風冥冥陷白日四
郊漠漠飛黃雲不成霖雨變枯槁轉覺卓午增蒸焚楚客
江頭正愁絕題詩欲訟雲中君

再述

天涯五日復五日萬里風煙坐短舫異域酒杯聊自遣故

山蒲艾向誰青湖晴鳥下莎光細野闊雲生海色冥自起
倚篷成獨立數聲漁笛帶愁聽

送劉正之南還

去年燕地初逢汝愛汝相過意不違離思又驚南國遠天
涯應惜故人稀霜林落葉隨秋雨煙塞飛鴻下夕暉試問
青衿趨壁水何如萊綵慶慈闈

道上見軍餉志感疊前韻

漢家飛將集轅門供國軍輸未乏援豈謂材官憂戰伐坐
令邊騎逼黎元每煩宵旰紆當宁未有忠良翊至尊此日
巖廊盡周呂擲無上將狂星垣

寄龍雲東

桂林天隔楚雲長
瞥見西書淚滿行
壯志豈知成汗漫
餘生拋復尙炎荒
天涯煙雨秋多思
歲晚風塵鬢有霜
幾處爲君魂欲斷
將因漁父問瀟湘

庚寅元夕雨和韻

柳條疑未透春催
寒色猶看傍晚回
鐙閃簷花浮雨細
月流窗影遞雲來
山林歲月驚蓬鬢
湖海生涯愧酒杯
何處兒童矜壯健
臨除簫鼓夜爭喧

春日雲山寄廖童二太史

七十二峯何壯哉
嶽蓮高傍青天開
江流如帶巖煙碧
石門過雨生蒼苔
藤花落盡杜鵑老
美人一去湘水哀
瑤芝瓊草綠可折
欲寄長安無使來

沙洲耆舊集卷之十一
寄羅二峯省解

風塵憶與天涯別，烽火驚傳海上書。
中散絕交知未得，馬卿多病近何如。
月明畫角雙愁鬢，春入孤城一草廬。
辛苦未妨終歲隔，艱難猶撼十年餘。

聽雪

草閣冬深睡初足，忽聞寒雪下逡巡。
空簷簌簌仍兼雨，虛枕蕭蕭欲近人。
鴻鴈天南無一字，兵戈塞北有驚塵。
生涯落魄年將暮，羞見梅花幾樹新。

再寄雙石

湖上寒風吹月明，孤舟官燭照灘聲。
美人遠隔青山暮，此夜相思白髮生。
客淚暗隨江雨落，愁心遙度鴈雲平。
多情

不及中流水日夕悠悠向比傾

喜道亨至

楚山鐙火曾看劍燕市風煙更此杯萍水幾年清夢遠天
涯今日好懷開古臺寒月秋相對高樹涼雲晚共陪白髮
兩人俱涕淚愁看風景重遲迴

聽子明誦江上懷友之作感而和此

愁顏覽鏡新絲重病骨勝衣舊帶餘蕭瑟獨憐潘岳賦幽
棲真戀少陵居孤城日夕荒煙斷草閣天寒細雨疏貪聽
仙郎歌白雪十年授簡愧相如

得士疇書用前韻

歲華荏苒哀歌裏歧路蒼茫涕淚餘千里風塵悲阻絕十

年江海怨離居洞庭雲盡青山遠衡嶽天寒白鴈疏忽見
書來還自喜開緘讀罷轉悽如

對雪

曉起寒風透客衣
縈窗皓雪墮輝輝
欲窺短幕還飄去
靜入重簷卻亂飛
獨坐書空轉愁絕
不禁把酒對霏微
天涯寂寞雲霄迥
故國迢遙人未歸

寄詹少華給事

苦憶少華詹給事
十年高卧玉峯寒
黃花詩酒陶元亮
皂帽江湖管幼安
嶽鴈聲和夢斷
楚天月色共誰看
難隨鳥翼遙相逐
儻惠昭華慰所懽

呂堰道中雪行

漢江何悠悠楚道幾千里野闊無行人鴈聲在寒水

無碍山房

碧嶂孤雲宿青天一鶴飛夜龕鐙影滅藤月照禪衣

南嶽下山

赤腳騎牛鹿青天下白雲黃庭千歲觀空憶魏元君

夢中寄桃村諸族詩有幾年不踏桃村路溪上桃花
今若何二句覺來因足成之

幾年不踏桃村路溪上桃花今若何卻憶釣遊如昨日天
涯回首鬢雙皤

天柱閣夜聽可泉詩話

李白獨吟秋浦上杜陵多在錦城隈夜深長嘯倚高閣明

月墮江潮乍來

雜興

長安春盡萬花飛
蝶浪蜂狂撲未歸
庭畔一枝香不斷
暖風晴日自芳菲

西山天半鬱崔嵬
萬壑千巖入翠微
悵望白雲還日暮
傷心不獨爲君歸

躍馬長楊紫汗香
誰將詞賦侍君王
相如寂寞仍多病
獨數歸鴉坐夕陽

月御星妃雲霧鬟
塵遊忽漫向人間
青山黃幙圍春色
十里松風落佩環

玉帶真人戴羽冠
步虛歸去珮聲寒
七陵松竹蕭森裏
玉

殿今開太乙壇

望湖亭下水如天曾是宣皇賜幸年
玉輦不來鳬鴈冷一湖楊柳鎖春煙

雜詠

九龍池上六龍飛嫩綠殘紅野四圍
翠扇遙看衝雨急鳳輿遙見度雲微

登石鐘望廬山

萬里長風浪作堆紫雲吹盡楚天開
起憑山石看廬嶽招手仙人跨鶴來

三月江頭花亂紅楚吳天闊水雲空
萬峯搔首東林遠獨上青山扣石鐘

廬嶽亭亭翠萬重，懸泉千尺挂飛龍。
石鐘山下江如鏡，映出青天五老峯。

送陳白石官吉水因寄念庵宮贊二首

漢闕承恩墨綬新，東風歸去已殘春。
黃金臺下垂楊滿，欲采長條贈遠人。

白沙潭水接金螺，玉洞春風長薜蘿。
懷遠因君重愁思，玉堂遙夕夢魂多。

送譚順夫分教南充

湖上君山落日低，巴江猶在洞庭西。
扁舟獨揭寒氈去，無數猿聲過五溪。

雙感卷

風雨松楸石子墳空將血淚灑斜曛百年蒿華盤青玉千
折江流帶白雲

送鍾時亭之南雍

霜落燕山萬木稀君行歲晚欲何依十年空獻君王策猶
向橋門著布衣

沈湘齋集卷第十六終